

興國縣志卷之十四

武事

按興國未置縣以前兵寇始末應兼考贛縣所紀平固未廢之時則晉書武帝紀尚有可考不特建置沿革封爵官師之見於史傳已也孔志疑文信國開府事不當列之兵寇更覺拘泥今於起義之兵及平寇之兵統名武事其事近碎瑣而不可竟刪者則附錄舊說或加用按語以存之

蔣志

晉武帝太康八年丁未冬十月南康平固縣吏李豐反聚眾攻郡縣自號將軍捕討伏誅

晉書武帝紀

興國縣志

卷十四

武事

一

宋紹興中虔州興國縣周十隆錢響謝小鬼等結集賊徒攻破興國雩都虔化瑞金等縣江西安撫使李綱遣州將何榮申討之復興國縣追至贛縣界殺死賊眾五百餘人後統制官李貴入寨招諭其黨悉就撫而十隆不從至十一年始平定

李忠定公奏議贛郡張志

理宗紹定二年己丑九月石城張遇龍文勝反於平固連破石城寧瑞興雩五縣安撫李壽明通判趙彥覃督

兵討平之

贛郡謝志

端宗景炎元年

元至元十三年

丙子秋七月文天祥開府南劍

州經畧江西二年丁丑三月取興國縣六月入興國八

月元江西宣慰李恆自將攻天祥於興國天祥不意恆猝至遣兵戰鍾步不利乃引兵就鄒瀾於永豐瀾兵亦

潰天祥至空坑兵盡潰挺身走循州諸將皆被執宋史

按志林以鄧光薦所作紀年錄於文信國開府興國一節未能了了特引劉岳申所撰文丞相傳云景炎二年三月入梅州始與母弟妻子相見進階銀青光祿大夫四月斬統制錢漢英王福引兵自梅州出江西入會昌戰雩都大捷因開府興國督謀張抃監軍趙時賞孟滌盛兵薄贛城下招諭使鄒瀾率贛諸縣兵擣永豐吉水招撫副使黎貴達率吉諸縣兵復泰

興國縣志

卷十四

武事

二

和臨洪諸郡豪傑皆納款淮西義士劉源以兵復黃州復壽昌軍潭州張璠張琥撫州何時皆起義兵分寧武寧皆遣使詣軍門受約束福建斬僞天子黃從傳首至督府軍勢大振貴達以正軍千人民兵數千次泰和鍾步張抃趙時賞趙孟滌率民兵數萬逼贛遇騎卒先後衝之皆潰自相蹂藉死孟滌收殘兵保雩都督府聞鄒瀾聚兵數萬於永豐乃引兵就之會鄒兵亦潰元將李恆以大軍乘其弊追及於廬陵東固之方石嶺都統制鞏信駐軍嶺上力戰箭被體不動猶手殺數十人乃自投崖谷死大軍追至空坑同

督府兵潰天祥幾被執值山逕險隘有大石忽墜塞其路乃得脫去既而妻妾子女皆陷惟母曾夫人子道生從天祥奔汀州趙時賞吳文炳林棟劉洙皆就執張抃劉欽爲亂兵所殺天祥趨循州蔣志

元成宗元貞二年丙申十月贛州盜劉六十僞立名號聚衆至萬餘勢甚盛江西行省左丞董士選請自往至贛境捕官吏害民者治之進至興國縣去賊巢不百里擇將校分兵守地待命察知激亂之人悉寘於法復誅奸民之爲囊橐者於是民爭出請自効不數日遂擒賊魁元史董文炳傳

興國縣志

卷十四

武事

三

順帝至正十二年壬辰流賊肆掠民居多燬及十八年戊戌僞漢陳友諒遣將陷贛城禍延興國焚掠殆盡黃志明憲宗成化八年壬辰草寇李福正聚衆於南村洞同知章廷圭討平之蔡志

武宗正德五年庚午七月流賊寇城火二日不滅十二月賊還自萬安經縣通判徐圭擒其副殺之賊遁蔡志

十四年招撫新民擒宸濠回經興國騷擾甚知縣黃泗以爲寇率兵禦之互有殺傷黃志

世宗嘉靖三十六年丁巳五月流賊從寧都來興國寇龍沙大掠三日聞官兵至賊乃去蔡志

四十年辛酉饒平賊張連作亂閩廣諸巢賊附之夏五月流入興國自龍沙出梁口萬安及泰和殺汪副使一中執王叅議應時勢益猖獗還過衣錦長信里溫陂等處焚劫一空新撫陸穩遣安遠令石廩領黃鄉葉槐等兵禦之擒斬數十人賊敗走出境

蔡志

辛酉五月流賊自雩都來縣水東里剽掠從贛縣往萬安不十日又賊一起自贛縣傑邨經縣北二十里剽掠過永豐六月初一日又賊一起自雩都來到長逕口初四日到惠化東中上下都及順義里之溫陂鄉民奮禦自辰至未殺賊頗多賊假退見領兵官率兵坐歇演武

興國縣志

卷十四

武事

四

營相去五里不肯向掾遂招號四集放火燒燬廬舍鄉兵大潰溫陂民被殺者前後二百五十七名被傷男婦五十名擄去者二百餘名稻糧牲畜屋宇爲之一空賊乘勢追至城下機總蕭貴榮登耳城發矢連斃二賊賊勢不振乃縱火焚學官而去自城西至南門外皆爲燬燼鄉民爲立義勇祠

蔡志

莊烈帝崇禎五年壬申三月流寇千餘自廣東來掠衣錦寶城二鄉殺虜甚慘屯札殷富地方距城二十里關廂鄉勇悉力堵禦陣亡數百人賊亦夜遁合邑建義勇

祠祀之

黃志

國朝順治元年甲申粵寇閩王總分鈔興國志

張尙瑗曰時闖賊已陷燕京郡縣起民兵為守禦計

興國煙兵之長曰蕭國忠姚章甫承邑令林演培指

聚眾數百人屯於白羊坳國忠者安溪武生趨捷善

騎射章甫壩南姚氏以貲雄兩人為邑中所推蓋五

六月間事也嗣是贛撫李永茂遣總兵金世任扼白

羊坳原任修撰劉同升自粵都來演培館之分司署

中謀聯絡吉贛演培徵督糧課至均村會

大兵破萬安按破萬安在順治二年十月奄至縛去囚於舟中信宿

守者識之曰興國令公也演培詭謂非是曰公毋驚

興國縣志

卷十四

武事

五

某故鬻糞者為人所負訟於公公直之今報德時矣

遂逸演培走至署懷印孛妻孛遯歸閩之莆田時永

茂方招撫閩寇為所給敗盟於粵都師殲焉寇充斥

數縣衣錦諸村落焚劫無虛日而世任之營於白羊

坳者與副將徐必達百嘉村之營為聲援必達為

王師所擊敗世任兵亦潰國忠遂退屯東岳廟章甫屯

瀧下水真君砦壩南民劉霖寰贛三峯營把總王大

勇福建流寓宋朝宗各聚眾數百人皆不逞之徒託

助興復名時剽掠墟里良民苦之

三年丙戌十月

大兵下贛州略定下縣兵至興國獲姚章甫斬之志林

張尚瑗曰時以柴震龍知縣事諸砦煙兵仍分踞郊
坳邨落知縣教令止行於城中時湖東湖西諸郡縣
蜂起者旋撲旋熾灘嶺間路澀如棘雩寧石城徵解
賦稅赴贛多取道興國或借貯庫中堆積盈羨為見
聞所覲

五年戊子二月十八日王大勇宋朝宗率眾數千人入
城知縣柴震龍典史武尚仁遇害志林

張尚瑗曰是年正月金聲桓王得仁反於南昌大勇
等遂入城殺知縣典史擄其家黃志云柴令一家殉難縱火焚

興國縣志 卷十四 武事 六

縣治延燒民舍累日夜不息恣掠街市贛營將李某
號李桿乃領軍來討大勇等戰敗還守其砦黃志云王大勇

居長信嚴埠坳宋朝宗踞衣錦鄉江頭劉霖寰踞垵南裨將牛某賀某敗國忠
兵於螃蠅藪走入梅窖官兵圍之梅窖在衣錦鄉東

界雩都之青塘塊然培塿廣縱二三百里有石室容千
人門竅紆曲劣容一二人國忠匿其中官兵積薪室

其口煙燄薰逼之復投炬於頂穴通明處數日國忠
死蕭姚煙兵始事者也既皆死眾乃推霖寰為主大

勇朝宗佐之又有張建台福建人大勇標下李魁華
黃正元丁公偉孫可貴朝宗族子宋大登楊三楊四

等分據巖埠大埠茶嶺蓮花山朱家山諸砦而聲桓
得仁提重兵寇贛攻戰相持者四月官兵還自救不
能討定贛營將李子和討瑞金敗虜餘兵三百人不
敢歸入興國大勇朝宗邀擊之殺略殆盡時兵連四
五載居民皆奔走竄匿農不田作齒骼載路林谷間
虎狼晝行城中惟瓦礫蔓草霖寰大勇僞稱侯伯爵
霖寰開府壩南出入呵殿日以講餉斂貨爲事閭井
稍居積者輒搜捕拷民益不聊生

六年己丑八月贛撫劉武元以守備李若垠署興國縣
事與副將鮑虎提兵擊宋朝宗於瀧下縛而沉諸水王

興國縣志

卷十四

武事

七

大勇謀襲城若垠知之伏兵於鳳凰莊大勇遇伏戰敗
走匿贛撫招之出降安插居上社旋爲其戚孫可貴所
殺部曲復殺可貴餘孽悉平

府志

張尚瑗曰五年十二月金聲桓伏誅六年諸方拒命
者漸次掃定劉霖寰聞贛撫已定遣兵計欲降大勇
殺霖寰約諸砦拒戰六月贛撫遣守備王某署縣事
行次勞田逗留不敢入八月乃更命李若垠以守備
署縣事與副將鮑虎提兵二千十六日至興國父老
士民迎之入城虎率兵擊朝宗朝宗不能敵請降虎
縛而沉諸水虎以不輯兵稍恣搜掠受調歸贛若垠

整飭軍伍召募鄉勇設練總以統率訓練之方略得宜兵民畏服有民婦數十官軍始至所攜重購以要其家來贖者若垠悉釋還之大勇見朝宗敗退據茶嶺十二月若垠遣兵入鄉勦賊支黨部勒方發大勇探城中空虛卽疾趨窺城若垠先一日知之乃佯遣三百人行仍從他路歸伏於鳳凰莊之松林二十四日大勇至北關教場若垠率千總咎某接戰賊有執白旗者大言曰我爲擒李知縣來若垠出應聲曰我是也射中其腕腕着旗桿不得脫合戰旣酣若垠馬蹶而墜家丁大娃子二娃子鄉勇朱天功掖之起易

馬復戰松林中伏兵出夾擊賊乃大敗陣斬數百人擒數十人盡斬之小南門雙橋下後門內時聞鬼嗥乃堙之不復啟孫可貴者大勇妻弟也通於大勇之妾大勇怒可貴遂殺大勇部曲爲之報仇殺可貴與其妾祭大勇若垠搜捕餘孽撫輯殘黎縣得安集邑人劉天真曰魏際瑞有言生爲穿窬殺掠之行而死獲取義成仁之譽此人心之不平

國初鄉曲無賴假義兵以縱劫奪尋私怨屠及赤子橫行邨聚大江以南逮嶺表所在多有第其間有死之得其正者有死之不足錄而罪不可以末減者亦顧

其主事之心何如耳國忠章甫負乘慢暴比之田橫
之節已降一等至霖寰大勇以下事不成而言亦未
順幸其未及燎原旋受撲滅使充其類可以與楊公
范汝爲之徒荼毒閭井後先相類列之寇祿夫復何
辭予少更喪亂轉徙流移嘗入李公電之幕中親見
其誅鉏方略撫輯焦勞大有造於吾興者以其由守
備官受撫軍委署前志不敢列之令尹正銜弁其聲
績泯焉無紀張侯以史才博識留心故實諮訪而論
次之非惟鄉邦軼事有所稽考而六十餘年以來禦
捍遺澤藉以不朽衰年追憶舊聞庶乎不負故知也

興國縣志

卷十四

武事

九

已

十一年甲午賊首會拱宸會象吾會玉華劉元谷踞梅
窖太平巖與青塘賊何輝明相聯絡出入永豐萬安泰
和零都等處焚殺擄掠十三年丙申遊擊左雲龍領官
兵六百六員名於二月二十四日由興國抵梅窖遊擊
洪起元領官兵四百四員名由寧都抵梅窖攻圍二月
不克傷把總熊子輝千總陳子龍官兵死者甚衆巖洞
內寬外狹洞口僅容一人兵不能入乃日夜就洞口堆
柴焚燒風旋火煙薰逼賊各奔出繫頸授首獲拱宸解

郡戮於市

黃志佟國器
撫虔奏疏

十七年庚子衣錦鄉賊蕭矮子聚黨數百於龍子逕劫掠鄉村擄男婦勒銀取贖窮民死刃下者甚多邑令向大捷招撫不悛隨請官兵勦除之

黃志

康熙三年甲辰九月內夜更盡有流賊數百焚掠北關及壩南武塘擄去孩童數十殺傷男婦百餘人至天曉去事聞遣鎮標遊擊吳松領兵襲追至石城之黃竹擒殺殆盡

黃志

十三年甲寅五月安插興國屯田之海寇石昭反六月贛遊擊吳某統兵勦捕諸屯陰助之不能克千總賈文秀典史錢志泗饋軍經江背洞賊尾擊之於塘背文秀

興國縣志

卷十四

武事

十

負重創從間道逸歸志泗被殺所從兵隸盡死屯師蔡璋計誘昭昭至縛送贛鎮伏誅璋以功授江西水師總兵去八月諸屯舉眾盡反贛總鎮進寶遣千總滿可成帥師至興與守備李應龍屯弁黃成章同守禦十一日賊攻南關焚李屋塘民居無孑遺可成與原任守備王三印率鄉勇共擊之戰於江東祠西門嶺城上發大砲擊賊賊始退仍踞壩南城被圍十日副將周某來援將合戰會興國把總李邦祿奉調征龍泉縣賊獲賊旗數十官兵旗以綠賊以白邦祿歸距城數里令兵皆持賊白旗涉春口壩賊望之以爲援也邦祿出不意奮擊城

中鼓噪而出夾攻之賊大敗賊首張治朱明乃退據崖石鯉公鯉婆樟石等寨黃捷先據寶石砦又有乾田黃泥割牛銅鑼及零都之雲霄鷓鴣搖藍等凡十三砦聲勢相援附近隣邑村庄多遭荼毒

志林

按康熙八年己酉

廷議以閩漳海寇投誠講分布安插之政贛興二邑兵燹流亡荒田獨多

敕遣海澄公標下都督總兵許貞屯田於贛蔡璋屯田於興次年庚戌春蔡璋率其屬張治朱明石昭黃捷先黃成章洪徵洪宜化等目兵千有餘人扶挈家口

興國縣志

卷十四

武事

十一

又數倍到縣縣令王璋懼其族聚叵測也請於郡守孔興訓興訓親至邑履畝按籍授田而析置之軍之名籍者不自耕召募閩廣流人賃耕旁郡邑賃耕者來如市或旁侵民田以荒易熟又多攘竊恣睢宄法事縣令王璋持法不撓蔡璋亦能斂輯和解比四年邑慙無事十三年甲寅耿精忠以福州叛海上遺孽鄭經擁眾窺漳泉諸郡屯將皆鄭孽舊部也通聞問受僞劄付覲秋成聚糧觀變爲亂而昭最無賴剽悍五月中於陳屋園先發陳屋園者昭所分墾屯處也治與明墾江背峒眾最盛諸屯皆仰其指使統帥

崖石諸砦為東西聲援賊勢益張巡撫佟國楨遣標官杜得功等十人入砦諭降皆被殺志林

按邱興祐滇逆韓大任黨也大任寇吉安命據浪川峒峒與均村潛坑隣比時又有謝元寶者據三關三陽寨皆與崖石諸寨相通張治稱偽平湖將軍妻楊氏鎮軍夫人諸賊為偽總兵以下有差亦有稱外委者蔣志

十六年丁巳滇逆韓大任走寧都萬安瑞金皆取道興境村民不敢屋居爭竄匿山谷知縣黃惟桂與守備余祥勒兵登陴晝夜戒嚴志林

興國縣志

卷十四

武事

十三

十七年戊午秋

詔以尚之孝為宣義將軍帥師勦崖石知縣黃惟桂招撫寶石樟石二砦賊十二月招撫浪川峒賊單騎詣興祐定約志林

按張治既死朱明欲弁所部其眾素聽命楊氏明乃專據崖石楊氏移所部入鯉公砦黃煜者吉安人也為治偽參軍楊氏信任之惟桂數遣人利害警曉煜煜以為然寶石樟石二砦賊先向惟桂乞就撫惟桂謁撫鎮面陳賊情向背事勢先後宜撫浪川峒以翦大任羽翼巡撫安世鼎總鎮哲爾肯皆然之惟桂

既與興祐定約大任調興祐出戰遂不聽調

蔣志

十八年己未二月邱興祐率其部至興國縣受撫楊氏以三月受撫惟朱明據險如故宣義將軍之孝道雩都率中軍都督胡順左右遊擊何奕賈重俊贛總兵許盛撫標遊擊李天柱俱以兵會遊擊張芳守備余祥率先導引爲軍鋒賊迎拒於觀音坳官兵奮擊多所斬獲六月抵崖石督兵仰攻之山嶄絕不可上士卒多死傷隨征永豐千總某遇礮死積炬燒其南砦適暴雨火滅賊復自固乃長圍以困之許盛知賊峙糧在干田寨引兵屠之積貯一空七月賊饑窘請就撫朱明等面縛赴轅

興國縣志

卷十四

武事

十四

門崖石平

林志

按邱興祐所部撫者七千餘人僞官三十餘人楊氏所部撫者六千餘人僞官總兵曾靈以下六十餘人惟桂祥具舟楫護送詣贛以次申送巡撫崖石者文信國開府時使他將營其上峰巒峭絕磴道盤互與朱家山蓮花五門洞螃蟹藪蜈蚣山斷續離合綿亘百餘里取徑由樟木山東道爲大路拔地數里巖壁削成仰而攻者矢石碎擊皆糜碎不可前賊踞其內與諸砦聯絡首尾官軍至則依險自固退則四出寇鈔賊聞楊氏受撫之孝兵至贛具牒懇曰知縣不聽

某就撫之孝詰惟桂惟桂曰向固言賊情有向背事勢有先後今後者宜第及矣恐背者未必誠向也將軍必欲驗之但遣人諭之一如浪川鯉公之下山歸命則得矣如言往諭則已斂兵把隘之孝遂議進兵惟桂條陳四事曰及天時扼險要斷水源絕糧道又繪山圖以進興國諸生黃大亨者素善鮑夔生夔生歙人在之孝幕中軍事皆諮焉大亨語夔生崖石屬興國由興國至崖石路險棘難行夔生以語之孝故取道雩都而命兩縣令激惟桂職饋餉贛同知孫公復主軍籍朱明旣窮促就撫所上僞印劄器械與鯉

興國縣志

卷十四

武事

五

公諸砦等而兵數倍之散歸鄉井者什之四願附興籍爲農者什之五入軍伍充兵者二十之一時三關賊最弱久乞降之孝怒韓逆嘗竄入其砦欲屠之惟桂力爭俱就撫遂伐山焚林夷坑谷毀壘培禁民毋得依巖以居逾年洪宜化與其黨至興國復欲開屯里人搏而斃之惟桂力請於府置不問事得已

邑人呂大夏曰興國處萬山中流遺浮於土著一旦隣方有警不逞之徒乘間竊發阻箐嶂自固雖其人無良抑亦山川險阻有所憑藉而然也前甲申之變傅會興復猶有所托名而爲之後甲寅寇亂起於

閩廣孽嗣怙恩樂禍直狼子野心之徒耳氛祲相纏
毒痛遠近興邑蕞爾支黨潛布機之伏者括必發前
後甲己符運適然亦數之最奇者矣黃侯官止一令
志在拯救偏隅然其撫浪川則功及萬安策韓逆則
籌佐吉贛誠一時偉人哉

王師進討取道雩陽雩令張侯亦在兵間雩人作平寇
碑欲掩其功并兩邑疆場亦皆訛舛齊桓公懲荆楚
而頌闕宮者歸之魯僖亦奚怪其然哉太史張侯諮
訪考覈所據郡縣文移元戎紀功冊歷歷不爽採風
者宜以是爲傳信云

興國縣志

卷十四

武事

十六

按志林敘次前後甲己兵寇始末最爲詳備孔志刪
節太多又不分年編錄今特釐正如右嗣是氛祲盡
息興民永享

太平之福所謂漠然徒見山高而水清豈非

當亡者之德威惟畏必期無可紀之武事而後爲神武

而不殺也歟

以上
蔣志

咸豐三年癸丑秋賊自泰和撲邑城知縣潘安國與紳
首田勇殲之

時粵逆洪秀全陷江甯分股圍省垣六月土賊鄒恩
澆襲踞泰和應之安國聞警編丁壯百餘名堵白羊

卡繼聞武進士韓進春有膽略急請與謀七月初旬進春奉母命與胞兄遇春等並帶練師張國任賴文普及壯勇三百名入城二十二夜衆議密於城北門穴小洞及曉賊闖入境旋撲城其前鋒蕭僞王揮扇導衆先至城下委弁王飛鵬啟小洞燃鎗擊之立斃賊復從西門來攻紳首楊敏成蕭郁督勇擲石擊郤之二十五日又新來賊數千攻益急安國恐城陷先書絕命詞於裏衣與進春登城督戰進春躡捷多力握大礮環城巡守晝夜不少息賊見之稍沮二十七日賊分擾城北河子口澄塘紳首劉煒蘭等會議殺

興國縣志

卷十四

武事

七

之時倉卒無標幟乃以灰墨塗額揭神廟旗馳抵河子口斬數十人賊急使人持僞示安民卽復誅之是日早紳首曾雲斌陳露斯持諭召南方田勇未刻回報乃屬進春偕把總張捷魁等出與壩南各勇直薄賊營北方田勇上下夾勦當斬首級七百餘顆其四竄逃匿者各勇搜斬殆盡事平巡撫張文毅公芾奏聞得

旨褒嘉官紳民勇均有獎敘

五年乙卯冬賊復自泰和來興安國屬紳首田勇圍勦略盡

時僞王石達開圍吉安十一月復陷泰和謀復仇北鄉居民俱清野入寨賊來無所獲生員鍾燦斗入城請令督勇途遇賊被害適進春自吉安回興募勇安國畱之與同守禦二十七日都司滿圖率兵勇禦於文溪賊驟至乃回城守賊乘勢至瑤岡以巨礮攻城北門棟瓦摧折又以火箭攻西南門城上禦以水具火不克燃惟城東門賊未攻出堵未入者聚門外均以固守爲恥乃約次日日出擊黎明壩南及附近紳勇俱到進春出與之合與賊遇於東街口進春發矢中賊手我勇競以矛刺之時城上謹聲如雷各勇知獲

勝直前斬首百餘級賊復冒死用擋牌攻北門我軍於門洞發鎗擊之不退突有橫石勇出以短刀砍之東門勝勇復由間道截出城下之賊無一得脫其踞瑤岡者西南勇從後擊之乃大潰沿途各勇截殺六十餘里夜至敦邱迷路墜溪澗者甚多次日查獲僞王丞相元帥將軍檢點等印四十餘顆旗幟器械山積耳級較三年所獲尤夥時南康周令帶勇救吉安適鍾太史啟峒在諸局籌餉請汪觀察飭令迂道先救興至磨刀聞捷乃返

六年丙辰春賊自永豐窺北鄙城岡楓邊等處紳勇出

境勦之賊遁

時賊踞永豐舉人胡麟飛書告警安國諭各局紳前往貢生藍炳芳至城岡與紳首鍾春魁楊輝坤楊建猷胡彥升楊和等率勇堵於觀音坳旋議出勦因督勇至和尚壩賊駭竄我眾追之頗有斬獲

四月賊自萬安窺西鄙各局紳勇堵卻之

時均村局紳告警紳首謝成彪劉煒蓮外委劉本輝率兵勇往援賊聞風而遁進春由間道出其前至萬安之澗田殺賊過半

五月賊圍郡城興勇贖糧往援水陸並進襄解城圍

興國縣志

卷十四

軍事

十九

時偽尚書程瀛糾黨十餘萬白吉安上圍贛郡各屬道梗城中米鹽一切惟倚興邑接濟汪觀察飛札調進春等督勇赴郡縋城斫賊營屢有斬獲犒賞優渥水東西賊連營數十里東岸鄉民給之曰興國勝負大至矣水東賊驚竄水西東路乃通

七月賊自泰和窺北鄙堵勇禦之遂遁

是年春上鰲十二堡局紳督勇堵白羊卡七月紳勇回家惟畱十二人守隘賊猝至適山溪暴漲我勇以賊阻水可以敵擊之乃倚林自蔽潛伏以待俄而賊虜至敵發賊斃賊出不意並虞伏兵不少乃卻走自

是與興毗連處亦約興力聯圍自保

七年丁巳春賊自甯都雩都窺東鄙衣錦鄉暨鼎龍各堡紳勇堵之至五月杪始遁

時賊踞甯都二月擾衣錦鄉邊界局紳曾紀忠率勇禦之力竭陣亡三月踞雩都賊復侵我邑鼎龍局紳蕭聲標督勇接戰中礮死旣而甯雩之賊合謀入寇我邑自江背洞上至江口墟隘口數十處處嚴防鼎龍紳勇以聲標之死憤極出勦斬獲甚多生擒者亦支解之賊懼竄歸甯都故衣錦鄉各隘尤急安國屬進春雲斌等率勇往援迺該處勇在蔡江獲勝生擒

興國縣志

卷十四

軍事

二十

賊目孫善佑父子斬之聞官軍已到勇氣益壯旣而賊遁於時鄉局紳首出力之尤者則有張淵曾衍桂廖忠基吳有容鄒遠棟鍾潤蘭謝建信云

四月踞吉安泰和永豐萬安及圍贛城賊合謀窺興各局紳勇堵禦卻之

時環興邊境皆賊壘自雩甯來者東有衣錦蓮塘江背洞鼎龍各堡紳勇堵之自萬安贛縣來者西有均村沙洲背龍坪各堡紳勇堵之北有楓邊城岡崇賢各堡紳勇以堵廬陵泰和之賊南有燕山龍沙埠頭各堡紳勇以堵圍贛之賊近城各堡贖糧赴援賊故

無間可入而下至臨江上至會昌各處商賈皆借道於興亦多寓興而避寇焉

七月巡撫者以興邑紳民咸知大義用能志切同仇屢挫巨寇而團防愈嚴隱然成一重鎮雖鄰寇環窺莫能入境江西團練應以該縣爲最等語入奏并將三五兩年解圍案請增廣武學額一名在事官紳民勇俱請獎敘奉

旨俞允

十一月踞吉安賊突入均村山阮等處官紳督兵勇追擊出境而返

興國縣志

卷十四

武事

三

時萬安之黃塘已與興聯團屢次殺賊聲援頗壯適賊突由山路乘大霧入境黃塘不守賊遂入擾均村老弱被害者百餘在籍鍾音鴻迅集各團紳勇請進春統帶並飭其子啟嶧錫綸隨同堵禦賊知有備由山阮永豐墟分竄興勇追至同逕口賊竄入粵

同治三年甲子賊自粵都窺興江背洞紳勇堵卻之時踞粵都賊丁山陽侵牛軛嶺知縣吳壽祺派外委譚福斌邑紳黃瑞榮率兵勇共堵江背洞局紳勇晝夜嚴防附近各局撥勇助之幾一月賊乃遁計自癸丑至甲子年止總司支應藉資擘畫者則黃瑞龍也

論曰粵逆之亂省會郡邑城陷而遭荼毒者甚多興
邑紳民獨能同伸義憤屢挫兇鋒上保郡城外勦鄰
寇比三年圍解後周觀察貞恪公親臨犒勞勘實申
詳仰叨

天語褒嘉七年秋耆中丞又復以江西團鍊興國爲最
大告蕞爾之區已獲保全而望重大吏

恩渥

芝綸誠一時之深幸也合觀舊志所紀前番之變始終
甲已此次癸甲一周謂之爲數其或然歟